

PFLUDERI-ASYL



Alti Garde

Fasnacht 1971

Sujet:

Mit hundert Frangge bischo derby

bi dr Drummeli-Lotterie

Mer mechte gärn e Quizfroog schtelle
wär het die neyi Leesig welle
nohdäm me kimftig wüil die faile
Drummelibilljee g'rächt verdaile
d'Fortuna soll doch jetz bestimme
wär bikunnt si und wär nimme.
Und die Pryse wo si mache
do het dr Bebbi nyt meh z'lache
dä ka jetz dehaime blybe
und pfluuse vor dr matte Schybe.
Drum froge mir ganz unverfrore
wär het die Furzidee gebore?

Wäm isch das si Art und Wäse?
Wenn's nit weisch, muesch wyter läse!

Es isch e Fasnachtsgremium
im Durchschnitt absolut nit dumm
nur wenn si duet dr Giggel bigge
und si dr Geischt in d'Ferie schigge
ka's ab und zue emool passiere
dass si e fuul Ei verliere.

Weisch jetz d'Leesig vo däm Quizli?
Wenn nit, lis halt no e bitzli!

Mer wänn e wenig meh uffdegge
denn muess es sicher jede schmegge
wenn byspilswys eim in de Ohre
duesch e wenig ummebohre
schtell'sch ebbis uff dr Axle fescht
däm sage mir dr Sägmähltescht.

Kasch di ändlig langsam bsinne,
oder hesch au Sägmähl dinne?

Villicht verrootet doch no aine
wär mir mit dr Quizfroog maine
s'heisst naimme innere fromme Strophe
"den seinen git's dr Herr im schloofe"
mir froge-n-is drum, nundedie
schloofe denn die Kaibe nie?

Weisch es jetze immer noni,
denn bisch z'oberscht obe ohni!

In däm Fall, s'isch zwor zimmlig schyter
froge mir halt nimme wyter
mer hänn grundsätzlich nyt dergege
wenn s'Comité duet Eier lege
nur sott'e's nit so fuuli si
wie Drummelibilljee-Lotterie!

Kunnsch au jetze nonig noh,
muesch zum Psychiater goh!

Jetz mäldet aine hindedry
das sig no viel, viel schlimmer gsi
die Furzidee isch g'stohle
me häig friehner emoole
die Leesig um dä Bäse
im glaine Nazi gläse!

Oh Comité, i grieg dr Kater,
das putzt sogar dr Psychiater!

An dr Ladärne-Usstellig am Zyschtig in dr Muschter-
mäss isch au unser Lämpli uss'gestellt. D'Usstellig isch
offe vom Nyni am Morge bis z'Nacht am Elfi.

H. Nöbs, Basel